



羅子溢與陳自瑤均讚飾演女兒的鄭湫月好戲。

有望爭視帝 陪跑都開心

同陳自瑤最夾 羅子溢冀再演CP

無綫熱播劇《婚後事》今日進入結局周，一眾演員昨日出席活動時落力宣傳，盼收視再升。主角羅子溢與陳自瑤（Yoyo）均被讚演技升呢，有機會爭視帝視后，子溢開心表示入行多年終獲認可，又指最佳拍檔非Yoyo莫屬，希望有機會再跟她演情侶，擦出更多火花！

羅子溢、陳自瑤、黎諾懿、賴慰玲與王敏奕等昨日出席無綫劇《婚後事》宣傳活動，提到劇集進入結局周，眾人大表不捨。子溢笑言：「有Yoyo陪我呢20集，如果可以再同佢演情侶就好，你話你係公司入面同邊個拍檔最有火花？」Yoyo識做說：「羅子溢囉！」子溢說：「我哋由14年前喺《缺宅男女》合作，咁多年尋尋覓覓，估唔到最合拍CP係Yoyo。」

提到Yoyo在劇中性感跳舞及在泳池仰天一幕，身材突出成為網民熱話，她表示：「我花咗幾日排舞，但正式拍攝場地改咗喺屋企，環境唔同晒，有走廊位又有傢俬，所以拍攝前2、3個鐘跟跳舞老師學，我出盡力去記、去跳，所以好難忘。至於泳池戲，我拍完冇睇Playback，亦唔知導演會用咗幾段，我睇到個效果都有少少嚇親。」子溢即說：「你係（豐胸）代言人。」Yoyo笑言：「你個胸仲大過我啦！」

子溢在醫院面對老父離世的一幕被網民

讚演技大爆發，很大機會提名爭視帝，他謙稱公司有很多好演員如陳豪和黎耀祥：「我有機會陪跑已經好開心，入行咁多年首次聽到咁多人認可，已經係最大得着。」

王敏奕減肥有壓力

穿平底鞋的賴慰玲被問是否懷孕？她笑言：「唔係，係造型師幫我襯，佢話呢對鞋最襯套衫。」她笑言將會「弱勢回歸」，跟劇中妹妹王敏奕修補關係。獲網民讚是「最靚小三」的王敏奕表示：「其實拍醜咗，拍嗰陣肥啲同大隻啲，監製要求我減肥，但每次監製要求，我就會好大壓力，反而減唔到，但出來效果都OK。」談到人氣劇《新聞女王》會拍續集，她坦言有份參演，並已聽過故事大綱：「係好有發揮，所以好期待。」



王敏奕透露會拍《新聞女王》續集。

小方亂噏婚期俾阿媽鬧

方力申（小方）、尹光及黃金寶等昨日以「愛心之星」身份出席《博愛單車百萬行2024》，大會邀得中央政府駐港聯絡辦新界工作部副部長李功勳、保安局局長鄧炳強任起步禮主禮嘉賓。第2年擔任大使的小方表示十年前試過挑戰笨豬跳為災區籌款，又試過由教練揀着玩滑翔傘，但不會正式跟導師學，以免家人擔心。提到他早前揚言3年內結婚，他笑言被媽媽鬧：「佢話我講出嚟，倒不如付諸行動！（女友呢？）佢應該知我係亂講，所以冇反應。」但他補充指每次拍拖都很認真，將來如何則順其自然。



方力申未打算結婚。

周汶錡教兩子中國文化

周汶錡昨日偕一對混血兒子Jacques和Avner參與《2024鴨洲洲洪聖傳統文化節》，她表示兩子分別讀小學3年級及1年級，齊齊讀傳統小學，因此懂得說、寫和看中文，在家也會跟小朋友用廣東話溝通，還會講解中國的傳統文化，例如農曆新年的利是和年獸、中秋節的月餅等。問到兩子成績如何？她說：「OK嘅，即使請咗補習老師，我都會督促，當然有時會勞氣，因小朋友較為貪玩，不過我唔係虎媽，唔會要求一定要擺高分，我覺得鼓勵更重要。」



周汶錡兩子非常精靈。

陳法蓉多得LOONG 9帶挈 經典角色「龍九」翻Hit

由歷屆港姐組成的慧妍雅集前晚在尖沙咀舉行成立42周年慈善晚會，陳法蓉、朱玲玲、曹敏莉、趙雅芝、翁嘉穗等盛裝出席，場面熱鬧。陳法蓉曾於電影《賭俠》飾演「龍九」，最近受《亞洲超星團》的LOONG 9帶挈翻Hit，她笑言：「《亞洲超星團》總決賽結果公布嗰吓我都唔知LOONG 9係乜意思。（你有追睇？）因為好朋友洪欣囑張鎬濂有份參加。」她笑指「LOONG」其實是潮語：「依家冇人講Dragon啦，好多人Send片畀我睇，知道團名係『龍年9個』嘅意思，我覺得幾特別。」

周吉佩與2007年落選港姐太太黃彥欣結伴到場，黃彥欣表示雖未成為慧妍會員，但稍後會嘗試協助會務，不排除日後入會。曾拍劇的她被問可會考慮復出幕前？她怕醜說：「應該唔會，推佢（老公）出嚟咪得囉，我派佢做代表，我主力照顧屋企嘛。」



陳法蓉有追看《亞洲超星團》。

周吉佩太太無意復出拍劇。